

# Peiden, Camuns, Uors, Surcasti e Tersnaus

Da la vischnanca politica da Suraua a la vischnanca da vallada Lumnezia

■ Il LIR preschenta ils artitgels da revista davart la Val Lumnezia e fa staziun en las anteriuras vischnancas da Peiden, Camuns, Uors, Surcasti e Tersnaus ch'èn situadas en la Lumnezia Sut. Dal 2002 al 2012 han quellas furmà la vischnanca politica da Suraua. Dapi il 2013 appartegnan ellas, ensemen cun las anteriuras vischnancas da la Lumnezia Sura, a la vischnanca da vallada Lumnezia.

## Val Lumnezia

Vallada laterala la pli extendida dal Rain Anteriur, circul Lumnezia, district Surselva (fin il 2001 Glogn), cumpiglia l'intschess idrografic dal Glogn fin a sia sbucada en la Val dal Rain Anteriur. Al circul politic appartegneva fin il 2009 Surcuolm (fusiun cun Flond a Mundaun) che sa chatta da la vart da Sursaissa, entant che las anteriuras vischnancas da Riein e Pitasch, situadas sin la spunda dretga dal Glogn a l'entrada da la val, na fan betg part da quel. (Dapi la fusiun dal 2014 fa ultra da quai Duvin part da la vischnanca dad Ilanz/Glion e tutga medemamain tar il circul da la Foppa). Il circul da Lumnezia, constituì il 1851/54, correspundeva territorialmain a la veglia dretgira auta. La dretgira da Val, vischnanca da lingua tudestga, era separada istoricamain da quella da la Lumnezia. Ca. 840 *Leugunntia*, *Leunizze*, *Leunicia*.

Dal temp da bronz tempriv e mesaun datescha la culegna da Crestaulta/Surin (anteriura vischnanca da Lumbrein), l'inventari da chats da la quala lascha presumar ina cultura da purs e pasturs sedentars. A Vella è attestada ina culegna dal temp da bronz tardiv, entant ch'ins ha scuvert ad Uors e Surcasti chats singuls. Munaidas romanas a Vella, Lumbrein e Degen. La baselgia da S. Vintschegn a Pleif/Vella, erigida probablmain en il 6avel/7avel tschientaner, è in exempel classic per ina baselgia da vallada. La plaiv gronda ha cumpiglià fin a l'entschatta dal 14avel tschientaner, ultra da la vallada da la Lumnezia, era la Val S. Pieder. Val è daventada ina plaiv autonoma enturn il 1300, Fraissen (oz Degen) enturn il 1345. Il process da separaziun da las autras plaivs ha durà dal 16avel fin viaden il 20avel tschientaner ed è vegni terminà cun Peiden il 1910. Duvin è stada la suletta vischnanca da la Lumnezia ch'ha aderì a la reformaziun (1526).

Ils bains roials, menziunads en l'«Urbari curretic dals bains imperials», èn vegnids dividids gia en il 9avel tschientaner tranter numerus vasals, il pli impurtant dals quals era l'uestg da Cuira. En il 13avel e 14avel tschientaner èsi reussi als baruns de Belmont da reunir divers signuradis pli pitschens; cun l'agid dals Lumnezians èn els sa fatgs valair il 1352 en la faida cunter ils conts de Werdenberg-Sargans. Tenor ina legenda da la fin dal 18avel tschientaner duain las dunnas da la val avair decidì la sort da la battaglia a Porclas. Suentar la mort dal davos Belmont (1371), è la chastellania passada als baruns de Sax-Mesauc ch'han engaschè indigens sco sutchastellans. Il 1395 han ils Lumnezians aderì cun ils medems dretgs sco ils signurs de Sax-Mesauc a la Lia dals signurs da Glion, precursora da la Lia Grischa. Il 1457 han ils Rumantschs residents en la Lumnezia relaschè ina lescha cunter l'immigraziun dad esters, drizzada betg mo cunter ils Gualsers, mabain era cunter ils Blegnasc che s'acquistavan cuntinuadamain alps sin territorii lumnezian. Il 1483 ha Johann Peter de Sax-Mesauc vendì ses possess en la Lumnezia a l'uestg da Cuira. Il 1538 è la Lumnezia sa cumprada libra dals dretgs episcopals. A l'intern da la Lia Grischa furmavan ils dus cumins da Val e Lumnezia la dretgira auta da Lumnezia. La dretgira bassa vegniva exercitada d'in mastral (Lumnezia) resp. d'in landamma (Val).

En la segunda mesadad dal 17avel tschientaner ha la Lumnezia enconuschì ina fluriziun da la litteratura religiosa rumantscha ed ina gronda activitad da construcziun (baselgias). La part rumantscha



La baselgia da son Luregn sa chatta al lieu da l'antierur chastè dals nobels da Surcasti.

da la Lumnezia ha adina fatg part da la zona interalpina cun in'economia autarca. En la segunda mesadad dal 19avel tschientaner ha inizià in ferm moviment d'emigraziun en ils Stadis Unids da l'America ed en Frantscha. Mesiras da razionalisaziun, prendidas suenter la Segunda Guerra mundiala, han provocà ina reducziun considerabla dals manaschis purils. L'emigraziun intensiva ha pudì vegnir franada pir cun il svilup turistic, inizià (surtut cun bogns termals) en la segunda mesadad dal 19avel tschientaner. A partir dals onns 1870 è la val vegnida averta successivamain cun la construcziun da vias davent da Glion ch'è daventà qua tras il lieu da transgardiada il pli impurtant per la Lumnezia. A partir dal 1900 han ils lieus turistics e da cura dal Grischun offert durant la stagiun d'enviern pussaivladads d'occupaziun era a la populaziun da la Lumnezia. Cun la votaziun dal pievel dal 1988 è Val daventà ensemen cun Vella, Lumbrein ed Uors il quart lieu da cumin dal circul. Part da la populaziun da lingua rumantscha: 2000 90,4% / 67,3% (megra lingua / tuttas indicaziuns). Il 2013 han las anteriuras vischnancas politicas da Cumbel, Degen, Lumbrein, Morissen, Suraua, Vignogn, Vella e Vrin fusiunà a la vischnanca da vallada Lumnezia. *Duri Blumenthal*

## Glogn

Flum, district helvetic ed antierur district dal Grischun, incorporà il 2001 a quel novcreà da la Surselva. 1344 *Gelengen*, tudestg Glenner. Il flum nascha al Piz Terri, percurra la Lumnezia e s'unescha en la chavorgia da la Val Mulin cun il Rain da Val per sbuccar cun quel a Glion en il Rain Anteriur. Ils davos 10 km avant la sbucada èn adattads per canutar. Il district dal Glogn dal chantun Rezia (1800–03) cumpigliava la Lumnezia (senza Surcuolm), la Foppa (senza Tenna), Lags, Flem e Trin/Crap Sogn Barcazi (senza Tumein). Dapi il 1851 cumpigliava el ils circuls da la Lumnezia, da Glion e da Rueun e disponiva d'ina dretgira cun sedia a Glion (emprima instanza per cas civils) sco era d'ina dretgira per giuvenils. *Adolf Collenberg*

## Peiden

Antieriura vischnanca politica, circul Lumnezia, district Surselva (avant il 2001 Glogn), fusiunada il 1963 cun Uors a la vischnanca politica dad Uors-Peiden, dal 2002 al 2012 fracziun da la vischnanca politica da Suraua; dapi il 2013 part da la vischnanca da vallada Lumnezia. Abitadi situà sin la spunda a la via da colliaziun tranter la Lumnezia Sura e Sut. 1345 *Pedens*. 1850 91 abitants; 1900 129; 1910 147;

1950 87; 1960 67; Uors-Peiden: 1970 116 abitants; 1980 69; 2000 90. En il temp medieval tardiv sutstaveva la culegna rumantscha dal 11avel tschientaner, sco feud episcopal, a la suveranità territoriala dals Belmonts, suandads il 1371 dals Lumerins ed il 1390 dals Sax-Mesauc. Il 1538 è la vischnanca da Peiden sa cumprada ora dals dretgs feudals. Fin il 1851 ha furmà Peiden cun Camuns e Cumbel in vischinadi. Ecclesiasticamain appartegneva la vischnanca a la baselgia da S. Vintschegn a Pleif/Vella, il 1745 è ella daventada ina curazia consecrada a la s. Trinitad e dal 1910–63 ha ella furmà ina plaiv. Peiden è vegni pastorà da chaputschins dal 1873 fin il 1924. En il fund da la val, da la vart sanestra dal Glogn, sa chattan la chaplutta menziunada il 1345 (consecrada oriundamain a s. Sigismund, alura a s. Gliezi) ed il bogn da Peiden, enconuscent dapi il 13avel tschientaner. Sias trais funtaunas eran, tenor in document dal 1563, en possess da Peiden e da Camuns. Il 1812 ha ina bova, il 1868 l'aua gronda destrui las funtaunas, da quel temp en possess dal medi e cusseglier nazional Gion Barclamiu Arpagaus da Cumbel. Il bogn, reactivà il 1873, aveva in bun num en ils circuls socials pli elevads da la Belle Époque. Il 1891 han ins erigi ina nova chasa da cura ed il 1906 in edifiz annex. L'Emprima Guerra mundiala ha mess ina fin al manaschi da cura, avert da mez zercladur fin la fin settember. Dapi alura dispona Peiden mo pli d'ina ustaria. Il vitg è periclità (sco Scuders) da bovas. Ils donnos vegnan surpigliads tranter auter da la Fundaziun Pro Peiden-Scuders. Peiden è in abitadi in privel d'extincziun. *Adolf Collenberg*

## Camuns

Antieriura vischnanca politica, dal 2002 al 2012 fracziun da la vischnanca politica da Suraua e dapi il 2013 part da la vischnanca da vallada Lumnezia, circul Lumnezia, district Surselva. Ella cumpiglia las curts da Camuns cun baselgia ed antieriura chasa da scola, Runs (dapi il 1903), Sutscheins e Masauns, situadas dad omdadus varts da la Val da Pala da Tgiern (laviner) sin terrassas aut sur il stradun. 1543 *Gamundtz*. 1850 77 abitants; 1900 79; 1950 117; 2000 60. Feud da l'uestgieu da Cuira sut l'avugadia dals signurs de Belmont (fin il 1371) e dals conts de Sax-Mesauc (fin il 1478). Ecclesiasticamain ha Camuns appartegnì a S. Vintschegn a Pleif/Vella fin il 1528, alura a Surcasti. Dapi il 1691 furma la vischnanca in'atgna plaiv, tgirada da paders chaputschins fin il 1921. La baselgia è vegnida consecrada il 1704 als ss. Gion Evangelist ed Antoni Avat. Las curts Cresta e Caglia,

bandunadas il 1805, appartegnevan ad Uors (sco Runs), ecclesiasticamain dentant a Camuns. Il 1538 è Camuns sa liberà dals dretgs episcopals ed ha furmà in vischinadi cun Peiden e Cumbel fin il 1851. La vischnanca purila finanzielmain flailva è stada suttamessa ad ina ferma emigraziun. Dapi il 1970 ha furmà Camuns ensemen cun Uors-Peiden, Tersnaus e Surcasti la cuminanza scolastica, culturala ed ecclesiastica da Suraua. Meglieraziun generala 1985–99. *Adolf Collenberg*

## Uors

Antieriura vischnanca politica, circul Lumnezia, district Surselva (avant il 2001 Glogn), situada sur la chavorgia da la Val Mulin a la confluenza dal Glogn e dal Rain da la Val S. Pieder. Punct da contact da las punts da colliaziun tranter la Lumnezia Sura e la Val S. Pieder. Il 1963 ha Uors fusiunà cun Peiden a la vischnanca politica dad Uors-Peiden. Dal 2002 al 2012 fracziun da la vischnanca politica da Suraua; dapi il 2013 part da la vischnanca da vallada Lumnezia. 831 *villa Vorze*, 1290 *Furze*. 1850 156 abitants; 1900 104; 1950 97; 1960 91. En il temp medieval è la vischnanca dad Uors stada suttamessa, sco feud da l'uestgieu da Cuira, als signurs de Belmont fin il 1371, a partir dal 1390 als conts de Sax-Mesauc. Il 1538 ha la vischnanca cumprà ora ils dretgs feudals e fin il 1851 ha ella furmà ina vischinanza cun Tersnaus e Duvin. Ecclesiasticamain ha Uors appartegnì l'emprim a S. Vintschegn a Pleif/Vella, a partir dal 1528 a Surcasti. Dad Uors han fatg part fin il 1903 las culegnas da Cresta e da Caglia (bandunadas) sco era quella da Runs sin la terrassa da Camuns. La vischnanca è stada en roda lieu da cumin da la Lumnezia. Dapi il 1970 ha existì ad Uors in center da scola primara (enfin il 2008) ed in center cultural per Uors, Peiden, Camuns, Tersnaus e Surcasti ch'han furmà dal 2002 al 2012 la vischnanca politica da Suraua. *Adolf Collenberg*

## Surcasti

Antieriura vischnanca politica, circul Lumnezia, district Surselva (avant il 2001 Glogn), fracziun da la vischnanca politica da Suraua dal 2002 al 2012; dapi il 2013 part da la vischnanca da vallada Lumnezia. Vitg situà a 998 m sin ina spunda auta sur la confluenza dal Glogn e dal Rain da la Val S. Pieder e sur l'antierur chastè dals nobels da Surcasti (von Übercastel). 1515 *Oberkastels*, tudestg Obercastels (fin il 1943). 1850 162 abitants; 1900 167; 1950 149; 2000 75. L'areal da l'abitadi dal temp da bronz, dal temp da fier e dal temp

roman (ruina da chastè), il legendar Crap la Gneida (crap-scalutta al sid da Surcasti) ed ulteriurs fastizs preistorics dattan perditga d'ina colonisaziun tempriva. Feud episcopal a Surdengias enturn il 1290 (bandunà), prefectura dals signurs de Belmont (avant il 1371) e dals conts de Sax-Mesauc (a partir dal 1390). Il 1538 ha Surcasti cumprà ora ils dretgs suverans episcopals ed ha furmà in vischinadi cun Vignogn (fin il 1851). La baselgia da S. Luregn (documentada il 1345, evtl. in antierur chastè-baselgia) sa chatta en l'areal dal chastè, la tur dal qual (12avel tschientaner) serva da clutger a la baselgia odierna. Fin il 1528 ha ella appartegnì a la baselgia da vallada da S. Vintschegn a Pleif/Vella, alura è ella daventada la baselgia-mamma da Tersnaus (fin il 1669), Camuns (fin il 1691) ed Uors. Surcasti è restà in vitg puril, cun cultivaziun da granezza dal temp medieval fin en ils onns 1960, oz oravant tut cun allevament da muvel (meglieraziun generala 1977–85). Il 2003 lavuravan mo ca. 20% da las persunas cun activitad da gudogn a Surcasti en ils secturs secundar e terziar. Dapi il 1970 ha furma Surcasti cun ils vitgs da Camuns, Tersnaus ed Uors-Peiden ina cuminanza da scola e da cultura. L'economia forestala ed ils tschains d'aua garanteschon las finanzas da l'antieriura vischnanca da Surcasti. Part da la populaziun da lingua rumantscha: 2000 86,7% / 90,7% (megra lingua / tuttas indicaziuns). *Adolf Collenberg*

## Tersnaus

Antieriura vischnanca politica, fusiunada il 2002 cun Camuns, Surcasti ed Uors-Peiden a la vischnanca politica da Suraua; dapi il 2013 part da la vischnanca da vallada Lumnezia. La fracziun da Tersnaus è situada a l'entrada da la Val S. Pieder. 1362 *Tersnaus*. 1850 (cun S. Martin) 232 abitants; 1900 (senza S. Martin) 60; 1950 175; 1980 69; 2000 70. Scuverta da craps-scalutta en vischinanza da la baselgia. Territori colonisà ed urbanisà da Rumantschs a partir dal 11avel tschientaner. Il 1368 è Tersnaus vegni suttamess sco feud da l'uestgieu da Cuira als signurs de Tersnaus e de Valendau, en il 15avel tschientaner als conts de Sax-Mesauc. Dapi il 1538 furmava Tersnaus in vischinadi cun Uors, Camuns e Duvin. A partir dal 1395 èn immigrads Gualsers a Tersnaus, als quals è vegni scumandà il 1457 d'acquistar terren e da maridar al lieu. La baselgia parochiala da S. Apollinari e da Maria Magdalena, menziunada per l'emprima giada il 1345, è stada colliada cun S. Vintschegn/Pleif (anteriura vischnanca da Vella) fin il 1528, alura ha Tersnaus constituì ina plaiv cun Surcasti e Camuns, daventada autonoma il 1669. La vischnanca da muntogna tradiziunalmain purila è vegnida reconstruida suenter l'incendi dal 1900 en furma d'ina tavla da schah. Dapi il 1973 na dispona Tersnaus betg pli d'ina atgna scola. Dapi ils onns 1970 ha existì ina cuminanza culturala cun Suraua. La mancanza d'ina infrastruttura da basa a Tersnaus promovava l'emigraziun. Ils da Tersnaus vivan surtut da la vendita da laina e dals tschains d'aua. La meglieraziun generala è vegnida terminada il 1998. Part da la populaziun da lingua rumantscha: 2000 76% / 86% (megra lingua / tuttas indicaziuns). Impurtanta colonia d'utschels-mezmieur (rinolof pitschen) sin il palantschin da la baselgia. *Adolf Collenberg*

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.